

南陵縣志

地 230.37  
41  
部 = 13

卷二十九

人物志

宦業

武烈

卷三十

人物志

鄉獻

文苑

儒林

卷三十一

人物志

孝義

南陵縣志卷二十九

人物志

宦業

宋昌永字禹功初以三舍法貢京師爲辟雍生靖康中金人犯京永倡太學諸生守義不屈已而朝廷重其節例補進義校尉事平渡淮南歸失其舍後就鄉舉兩薦春官紹興辛未奏名第一累遷太常寺丞出爲河南參議改淮東參議以奉議郎致仕卒於家

劉拯字彥修宣州進士及第知常熟有善政歷官吏部尙書左轉工部以樞密直學士知同州坐侍御史洪彥升論罷歿祀府鄉賢祠

董必字子疆登熙甯九年進士久從王荆公遊所至有聲荆南府建堡寨以控制溪洞諸蠻不敢爲寇以功再任卒於官贈龍圖閣直學士

趙企字循道登熙甯九年進士材藻華瞻風度灑落爲時所推仕至禮部員外郎階朝請郎卒

明秦銘字日新宣德中由國子生知陝西同州爲政廉平巡撫中丞耿九疇薦擢本省左參議歷仕二十餘年清介一轍所至有聲致政歸杜門養重

孫昊字曰明宋龍圖學士孫諒之後少有文名督學



御史戴珊稱十才子以吳爲首王鏊董傑輩次之領南畿成化丁酉鄉薦任浙江海甯令抑豪強旌良善築隄捍海民賴以安卒於官民爲樹思德碑

阮璉字重器由貢生任蕭山縣丞甘淡薄赴官不攜妻子俸外一毫不取興利除害敢於有爲邑東濱海潮漲汨沒居民死者不可勝紀築隄捍之民賴以安

未及三載陞陳州判官

陳州府志作祁州

乞休歸蕭民德之

爲立去思碑

谷敬字資敬敏而好學樸而不華由鄉貢累任東昌府儒學教授致仕操守始終如一

南陵縣志

卷二十九 人物

二

陳孜幼穎異長與兄都運效俱以文名領宏治壬子鄉薦任霸州同知奉勅清理宣遼二鎮屯田蔚有能聲陞甯羌知州川蜀流賊羣衆殺掠郡邑皆殘毀獨甯羌獲全及致政歸閉門吟咏不入公庭性方正仁厚卒年八十三

崔雲復姓許字時望善屬文宏治辛酉舉人知恩縣廉明勤慎擒巨盜遠果民得安堵陞膠州守以父艱未赴服除有勸補任者雲歎曰向所以戀戀五斗爲親屈也令復何求哉遂築室墓側日以典籍自娛絕跡郡邑卒年七十恩縣立去思碑

王木字近仁正德丁卯舉人授江西廣信府推官以廉潔著遷湖廣辰州適洞蠻拒命木設策平之特詔以旌初辰俗不諳織紵木爲設機杼召民間老嫗入署家人教之自是辰婦女始知本務沿爲風俗後有邑人熊如泰者任楚府經歷猶親見其民歲時尸祝云

周儀字宗式賦性正直生平孝友父母旣葬廬墓所三年與兄僖析產儀讓其二領正德庚午鄉薦辭里甲百金餽及宰宣平有廉愛聲

府志懿行省志孝友

汪全字體之舉嘉靖丁酉鄉薦生平孝友曾鬻田代

南陵縣志

卷二十九 人物

三

兄償負任福建漳州府判適倭寇憑陵設策殲擒論功受賞漳賴以安後致仕歸杜門著書以終

汪鑑字衡夫嘉靖丙午舉鄉試就銓任邱令

任邱楊志作沈

邱清廉正直矯矯有聲毀淫祠惟存漢壽亭侯廟改令新樂清驛傳減馬價招集流移邑人賴之遷岳州府判致仕歸

陶宗儒嘉靖癸巳選貢擅文譽志行卓然任山西布政司理問克勤厥職陞山東青州府通判以收鑛賊功加銜僉事未幾移疾歸宣邑殿撰沈懋學宗儒門下士也寄詩青州有云小試青州什英雄用武秋笑

談翦宿寇霧捲海濤收蓋紀其實云

施善教號心寰十二歲能文弱冠通五經子史以大  
收首擢游庠明年試復第一食餼又明年應隆慶恩  
選已卯擬元未獲凡七試始登戊子賢書乙未成進  
士洪陽張相國署其卷曰己卯科已知爲奇士寥寥  
十七年猶然高第所謂有志者事竟成也授戶部主  
事督西倉遷員外郎奉使朝鮮秉性質直少文仕途  
多躓謫福甯州同知陞靖州守復轉靖王府長史致  
仕居蘆塘布衣徒步嗜古課子歲饑隨所有以濟鄉  
人

汪冀夔號一寰萬曆乙未進士初授襄陽令襄故劇  
邑郵符充斥逋負叢積夔治煩如簡有聲嘗從疑案  
內辨出大牌十七人襄民德之爲刻辨冤實錄庚子  
分校省試任六年奏最陞南京戶部主事卒

葉時晏號瑤山由貢生歷仕至順天涿州知州性仁  
慈政尙簡易視州事如家事見有糴新穀者歎曰糴  
賤糴貴此民間所以鮮積貯也嚴禁之有訟者輒愀  
然諭以里鄰睦而後風俗淳奈何相爭相軋于天地  
和氣爲身家憂民薰以德訟獄衰息奉文丈量履畝  
親勘胥吏無得售其欺鹽務常規盡卻諸上臺獎以

畿輔循良第一

管一鯨字若谷少有文名所友皆知名士由歲貢知新津縣廉潔持躬愛民若子奢酋之亂運籌保境邑中火災亟脫冠服投烈焰中曰甯焚令毋焚民火旋息陞養利州知州土司龍甯內訌督撫委鯨輯定之以勞致疾卒於官

戴新號浴日萬厯甲辰進士初授虞部主事典節慎庫多所釐剔出知甯波府風裁明敏吏民畏服郡瀕海數苦倭寇造船備械防禦周至寇不能爲患禁曹官毋受訟牒下僚毋用酷刑禁監委禁折乾嚴正之

南陵縣志

卷二十九

人物

五

績最於浙東陞湖廣武漢道未赴任卒祀甯波名宦祠

戴士憲號蔣陵性沉潛好讀書嚴冷寡諧有返樸歸眞意由天啟辛酉鄉薦署亳州學正賦詩論文稱風雅博士流寇刼掠同州守籌畫捍禦城賴以全遷贛州判慨然解組歸足跡不履城市居鰥不續娶里黨義之

許久申字日華職方夢熊長子以例貢同知山東德州再補河南汝州有吏能轉雲南澂江府通判嘗權廣西景東二府事治逼沙夷恒苦刼掠久申至督土

司兵卒三千人親冒矢石宣諭威德沙夷隔江羅拜  
還所掠男婦二百餘人性畜千餘郡境以甯所轄六  
涼越州二衛軍儲繁委積逋不可詰故事責廣西徵  
一二衛胥吏奔走頻年負累久申上言二衛設有撫捕  
今以廣西越二百里而徵之何如捕撫坐而徵之爲  
便請還衛政於捕撫兩臺嘉其議從之其在景東時  
逋負者多逃入威遠州久申乃令曰凡我窮民復還  
故業給以牛種始聞挈子女至者一二百人久申悉  
編入鄉里安插俸糶米給之自是老幼攜持不絕  
一歲中致二千有奇府治遂成都會景東土司陶明

卿沅江土官那天福交惡擁兵相殺久申馳往諭之  
諸酋長皆下馬投戈久申因命取酒爲兩家設誓遂  
以無事嘗請革茶稅疏通象解諸生田騰龍田騰鳳  
因誣服論死久申廉得情辨釋之又嘗防新興河招  
撫巨盜盡歸耕販以母老告請慰留加臨安府同知  
駐新河泰昌元年乞休歸崇正中以建儲恩晉階奉  
政大夫子名成仕北京西城兵馬指揮終襄王府審  
理正

王世幹字旋宇天啟初由監生任嶧縣丞佐政有聲  
署縣篆值白蓮賊倡亂幹率義勇指授方略與賊數

萬戰於邑之鳳山擒其巨魁餘黨悉遁境獲安堵民尸祝焉後以註誤去任士民擁道泣留賦詩歌繪圖以贈謂公歸常如見我百姓哭別衢路時也

清秦才管字尾仙與兄仁管同登順治丁亥進士並官戶部主事累陞郎中兄弟友讓奉職恪謹司權蕪湖省苛稅便賈舶選最提學陝西僉事慎簡寒峻時懼隕越會病聞父母喪號慟仆地遂不起藩臬諸僚哀其廉貧歛金爲賻櫬始得歸才管爲人樸厚稱長者多恤宗舊年不中壽一子又殤論者僉曰天道無知兄仁管以子雍承其後祀陝西名宦本祠縣祀鄉賢

南陵縣志

卷二十九

人物

七

程天衢由增貢生授陝西鞏昌府階州同知階州壤接西番治境遼闊於西固城另設同知衙署分理民事天衢蒞任除宿弊賑災荒惠洽黎庶威讐番人政聲籍甚以大母喪承重丁憂歸服除藩檄屢促起服天衢曰昔毛義捧檄而喜親在故也今我何如遂以疾辭不赴時論高之學使簡公題額褒美居鄉助修學宮葺籍山書院夷險道建橋梁尤多善行

王輔字左星運使奐長子才倜儻喜任事篤於孝友由貢生當授邑宰念母老遲徊不卽謁選久之任山西永和縣縣荒陋文教未興輔首崇學校月三課親



爲殿最以示鼓勵又時進其少雋指授爲文法度自是邑人士咸知向學邑舊多流亡輔詢所苦眾謂解費不均民累特甚輔令費準地派民免賠累諸流亡得以復業至凡公費悉出官橐不以責民民頌德署縣門曰公正廉威天下少解囊賠錢自古無語雖俚紀實也尋病卒邑人哀之初奐守河間親老不能從留輔代養於家深得歡心奐父嘗語人曰孫善承順吾竟忘其父之遠宦也南邑秋糧輸納向未設庾廩嘗有風雨紅朽之患輔獨出貲建倉又嘗同紳士議復條編甚力諸所設施有裨里黨類如此祀鄉賢祠

萬國號雲坡夙擅文譽仗義疏財康熙壬子以選拔入雍教習授知縣改授亳州學正士習頽靡國至日以砥行讀書與多士相切劘月有課以覘勤惰文風聿振五護州印清操如一州城被火燒延千餘家亟出粟以賑見道路暴露者捐棺瘞之州牧朱之璉治績燁著緣盜案解任新牧李班已蒞任而民心不忍朱去欲留其行國乃奮筆臚其善政通詳上臺朱得復任檄下之日歡聲雷動尋陞鳳陽府教授以目疾告歸州人爲立去思碑初國赴任時焚鄰里逋券約數百金及林居數年不涉外事易簣時猶吟咏不輟

子方涵性至孝年二十母張歿哀毀骨立因父在不  
敢廬墓獨處一室三年不入內閫

劉運灝字鴻起光祿楷第三子楷以繼弟輩爲後以  
屢困闈試捐授直隸贊皇縣知縣縣治萬山中與晉  
壤接爲逋逃藪舊於城守兵外另設戍兵於王家坪  
兵悍爲民病灝至威惠並行兵乃帖息民藉以安徵  
輸改行條編闔邑稱便尤加意作人邑額入學八名  
癸巳學使按部至閱童子卷歎曰非劉令詎能至是  
特拔至十二名以才爲諸上臺所重凡鄰邑捕蝗監  
賑查視河工悉以委灝所至有聲攝篆饒陽新樂斥

勢宦懲蠹役嘗爲前令代完虧空以母卒丁艱邑民  
懇留於臺司將具疏請灝匍匐泣曰衰經視事天良  
以滅何以臨民力辭乃止扶櫬歸送者道塞抵家數  
月而生父病劇以改大學事諄諄遺命灝與諸弟泣  
領之後以奔馳勞瘁致疾事未下先卒邑祀鄉賢祠  
劉運鮒字西臨康熙戊戌進士由庶常授檢討充實  
錄館纂修改御史巡視南城五方雜處嚴緝姦匪商  
民感戴擢刑科給事轉工科都給事尋授廣東惠潮  
道俗健訟運鮒傲刁風除陋習豪猾斂跡以艱歸服  
闋補刑部郎中兩任分校所得士裘日修王會汾蔡

揚宗皆有名出知雷州府清介謹慎以疾卒於官  
吳瑞字舜班少敏慧以諸生貢太學考入一統志館  
期滿授福建連城令連民生女不舉生男殤輒啗犬  
豕瑞嚴禁革其俗上官以爲能調繁武平邑愚民每  
食斷腸草自殺洩忿瑞至敦勸遏絕厚賞掘草根者  
一石十金以除其害民德之爲立祠於賢良以軍功  
議叙陞授延安知府延有三邊定靖二邊兵餉就近  
徵收於民便會有題歸州縣者瑞爲哀籲得請如舊  
至均攤丁稅停墾荒皆力爭得之又捐俸葺尊經閣  
制禮樂器新韓范祠暨橋東門道延民感頌大將軍

岳鍾琪委攝榆林道料理軍需間關盡瘁帥府深加  
器重事竣以父老告終養格於例力請改調補禮部  
員外郎一切持正於名器不少假久之得陳情歸長  
子一鳳戊午副榜卽用教諭以好善樂輸議叙加四  
級

劉攜字杓龍雍正己酉舉人乾隆中知雲南江川縣  
癸未冬地震水涌石裂村舍蕩析無存攜因暴露之  
倉穀計口賑粥急請發帑以繼生者得食死者得槥  
縣學舊在城外遭水漂沒攜遷之城中輪奐甚備歷  
晉甯新興二州奉檄讞鉅獄全活二千餘人卒官士

民泣送徧野江川人勒石紀績焉

陶煊字熙文乾隆戊午舉人壬戌會試錄取明通榜任溧水教諭以薦遷知直隸保定縣調順義恭逢駕幸灤河先一日雨水壞橋道需修葺費甚急吏借得千金詢知出自有案之家卻之曰甯以誤公干吏議不可苟且受民財造次中有守如此丁艱服闋歷江西東鄉樂安金谿興學校建義倉決訟無滯民甚德之歸家貧甚人嗟惜之煊曰居官無錢是好消息處之裕如

劉祖佑字念貽監生緣例入仕任浙江運副乾隆辛

南陵縣志

卷二十九

人物

十一

未歲禮發鹽義倉賑濟全活甚眾奉檄經理江湖水利率葑輦淤湖流深暢湖外闢去灘蕩八百八畝增溉仁和海甯田二千頃署玉環同知懲悍民定疑讞軍民帖服島嶼肅清辛未壬午恭逢鸞輅時巡兩次引見蒙恩賜貂皮內段荷包在浙江二十餘年歷攝金華諸邑卒於官

以上舊志

明管涔成化中官桂陽州同知先是峒寇破桂陽公宇

學校皆被燬涔到官即請修復如舊制

省志  
宦績

江玄宗字雙溪正德己卯科舉人擢順天府推官陞

山東濟南濱州知州所至有聲經順天府知府申詳  
疊頒旌獎復得御史張以立宗持身端正讞獄詳明  
保奏由是超擢不次終至湖廣按察司著有雙溪文  
稿行世

谷同字用中嘉靖十五年知上猶縣清介自持以培  
善抑強爲己任豪民捍法必嚴治之洪水衝決西城  
數十丈同捐贖鍰募工修築未嘗擾民

省志  
宦績

俞金字敬之廩貢生其先爲諸生時卽有擔負天下  
之志及爲廣東推官政簡刑清遐邇感戴適洞寇發  
官兵不能制金奮不顧身徑入賊壘曉以忠義禍福

南陵縣志

卷二十九

人物

十三

寇遂降故其時民謠曰知府一塊泥同知一堆土不  
有俞推官幾到雷州府任滿陞鹽運使渡海遇風濤  
焚香祝天海波遽甯故晚別號曰甯洋公明嘉靖甲  
午卒

俞鏞字廉之例貢任湖廣衡州府經歷居官清正視  
國猶家字民如子時軍餉甚急輸運維艱撫按夙知  
其能遽爲委任鏞不辭行至洞庭遭風糧溺鏞恐負  
所任捐己俸並傾家貲以償之邊急賴以無虞事聞  
朝廷特旌其忠

清梅元康熙二十一年任普甯縣雲落徑巡檢至則編

戶口冊一街一巷必於隘口設柵以街中人司之計戶值宿週而復始又令各舉老成者名街長使董一街之事月之朔望集紳耆講誦六箴畢卽按冊躬履清查雖窮村荒堡不憚寒暑不計信宿蒞任三月道不拾遺有訐訐者一語卽解終元之任雲落徑無盜賊無涉訟者或餽遺則堅卻曰無德於民安可擾爲在任三年以憂歸民至今思之

省志  
宦績

王泰雲號春穀以四庫館謄錄議叙從九授貴州貴定縣典史會同仁苗變檄至軍營辦事以功補雲南麗江井鹽課大使又以隨軍平定川匪功陞合江縣

南陵縣志

卷二十九

人物

十三

知縣加知州銜調成都省徭役修學宮歲荒捐賑全活難民無算晉敘永直隸同知以罣誤去旋准開復發奸摘伏吏畏民安署雅州知府卒於官

省志  
宦績

陶士霖原名青芝道光壬午進士翰林院庶吉士散館授禮部主事薦陞吏科給事中出爲浙江溫處兵備道及貴州督糧道補授長蘆鹽運使咸豐元年洪楊起事奉旨督辦闔邑民團號敬勝勇破賊屢著奇功七年幫辦甯郡糧臺並總理灣沚協防局供應鷓

山大營餉米積勞卒

省志  
宦績

陶濟福原名珂字松亭咸豐辛酉拔貢同治甲戌由

官學教習考取內閣中書庚午科中式舉人嗣經委署侍讀充本衙門撰文國史館校對俸滿授福建汀州同知以軍功保獎在任儘先補用知府歷署台南府知府石馬通判龍巖直隸州知州所至有聲並充辛卯癸巳甲午等科福建鄉試同考官得人稱盛云徐乃光字厚餘廩貢生江蘇候補知府光緒甲午由出使美日秘國大臣楊儒奏調出洋派爲紐約正領事官領事一職以保衛本國商民爲專務當是時粵東三邑四邑華僑在紐約者數有七八萬人因爭商業致啟械鬪聲勢洶洶公使恐美官干涉有關國體

諄屬妥爲處理乃光責以大義勉以善言百端開導衅隙消弭自此兩方悅服頌聲交作共贈扁額衣鏡等物用誌愛戴任期滿保陞遇缺卽補道分發江蘇並賞加二品銜其服官江蘇也曾派招商局官運處差孽畫周詳轉輸迅速又派金陵機器製造局差研究術藝推陳出新又派江蘇駐蕪米釐局差興利剔弊稅收銳進癸卯兩江總督魏委赴日本觀操日皇賜三等瑞寶勳章丙午又委赴徐州閱軍嗣鐵大臣良遵旨南下清理財政委查各件事宜深資贊助後奉鹽政處聘爲諮議官旋委辦揚子淮鹽總棧皆能

矢慎矢勤恪盡厥職辛亥引退回籍未幾病卒

徐乃斌字孝餘生而穎異賦性肫誠以孝友聞鄉里由附貢生歷官同知知府道員供職於蘇贛粵東各省先後派充漕河行營營務處高澗子嬰聞鹽城仙女鎮大勝關釐金等差精詳廉潔所至有聲而徵權捐釐處脂不潤解欸比最多之年數逾倍半上峯嘉獎謂爲公而忘私嗣調會辦滬甯鐵路測勘及購地事件維時滬地華洋雜處風氣未開非常之原黎民所懼乃斌悉心籌畫凡所以保主權順民意裨路政者靡不統籌兼顧聿底於成及以道員分發粵東總

辦自來水及省河隄工規畫機宜剔除弊竇不肯瞻徇情面尤爲人所難能他若辦理順天江蘇順直各賑捐涓滴歸公已飢已溺活人無算光緒戊申年卒強仕有爲遽嬰疾歿衆咸惜其未竟所施云

何葆麟字頌圻幼穎異好誦讀光緒乙酉舉人援例得內閣中書派管理誥勅房事務本衙門撰文方略館校對等差嗣以平定陝甘回匪方略告成議叙以主事用甲午會試中式進士告歸本班籤分刑部乙未考取軍機章京丁酉派總辦刑部秋審處免補主事以員外用葆麟官刑曹凡八載勘讞獄訟惟矜惟



慎嘗謂秋官須得春意仁厚之心溢於言表壬寅派  
方略館纂修兼外務部行走是年以道員分發江蘇  
歷充江南製造局會辦江甯初等學堂監督江甯禁  
烟局總辦丁未郵傳部奏調以僉事留部補用旋派  
赴滬檢查電政並查勘江浙商辦鐵路款日事宜宣  
統己酉回部補參議廳僉事辛亥引退厥後恒以書  
史自娛嘗持論曰聖人言愛眾今人言愛種愛種則  
有愛必有不愛愛眾則無所不愛弟子天性未漓教  
之以汎愛眾使其無欲害人之心涵養蘊蓄擴而充  
之則天之所生地之所養雖絕域殊俗無不在我胞  
與之中此所以有教無類忠信篤敬蠻貊可行也語  
獨能見其大生平篤於孝友十歲失恃逮事祖母三  
十餘年祖母偶病舌蹇不能言葆麟焦憂萬狀形諸  
夢嚙俟如初乃已卒年七十一

以上新增

武烈

元徐用和至正十二年海賊猖獗行中書左丞帖里帖  
木兒咨取用和參贊軍務剿捕海賊招撫有功陞都  
鎮撫上命繪圖傳遠勅賜伴僕二十四姓及卒賜祭

葬墓在繁昌石龍衝

府志宦績  
通志武功

明何應龍字子驥晉孝子琦後風采英毅多膂力涉獵書史通大意鄉鄰有爭輒爲直之莫不誠服元末里中俠少嘯聚間發應龍謀致渠魁斬之餘悉匍伏請命乃散粟給士部署捍禦鄉井獲安前怯烈馬赤星吉開省太平卒然徵兵無應之者應龍起義兵以從有功星吉以聞授珠虎符爲民兵萬戶丁未府志丁未作乙未歸附詔世襲其官隨師四出累著功勳洪武戊申從左相國徐公達北定中原還京師備宿衛丙辰西征至歸德州以疾終遺書誠諸子拳拳以睦族爲訓子執中襲職仲子時中聚姓同居者九世景泰甲戌

南陵縣志

卷二十九

人物

十七

元孫讓自備米四百石納通州倉懇辭冠帶願請信

牌詔旌曰尙義之門

府志宦績

劉維清號漳濱萬厯丁酉戊戌聯捷武榜初授新江口坐營都司操江丁公器之委開統京武弁賢否凡有資緣拒弗納陞薊鎮石匣營遊擊舊操練日軍士各有例獻清盡卻不受陞浙江北洋遊擊乘風出汛不避艱險民爲立祠招寶山陞湖廣鎮筸參將卒

府志

省志宦績

管一馴號甯海萬厯乙卯以三科武舉厯任至保定大甯掌印都司護總鎮印時闖賊犯鎮一馴用連環

砲戰卻之夜巡城遇都御史張寅從妓館出明日逐  
妓去張愧恨因一馴出城探賊遂以通寇誣劾下獄  
適原任南陵知縣甘文奎爲刑部郎力救得不死後  
都城陷出一馴於獄授僞職不受遁歸旋卒

府志  
宦績

### 以上舊志

清李成謀字與吾湖南沅州芷江人光緒間奏准改籍  
南陵本由行伍出身咸豐初應水軍募隸楊勇愨公  
戲下旋與粵寇轉戰湘鄂潯陽以功擢副將後克復  
九江安慶擢漳州鎮總兵又克蕪湖金柱關東西梁  
山各要隘擢福建水師提督成謀軀幹雄偉身長八

### 南陵縣志

#### 卷二十九

人物

十八

尺能一手樹大檣張帆而行胡文忠公嘗歎曰詩所  
謂有力如虎執轡如組者其李將軍之謂乎當其過  
安慶克銅陵逾土橋至舊縣峽口也見江南水軍紅  
單船紅單船上人以楊公一軍從賊中來何以飛渡  
至此又言銅陵泥汊賊築堅城二攻七月不下楊公  
令公往攻不半日拔之盡夷賊眾獲大砲數百尊大  
拖罟船一三板船四得米六屋軍械無算悉送紅單  
船紅單船將大愧服胡公奏是役出奇制勝功最上  
同治壬申以彭剛直公密保擢長江水師提督在任  
最久長江三千里桴鼓不驚盜賊屏息皆成謀力也

人稱爲中興名將晚年愛南陵城北山川之勝築別墅於倉前每當軍政餘閒時與賓僚往來讌集其中或面場圃話桑麻以爲樂生平急公好義曾捐貲修理崇聖祠奎星閣城隍廟縣公署以及橋梁又喜獎掖後進每逢文武省試闔縣士子咸贈卷燭費且獨力添建春穀書院號舍二十七間並刊有碑記其餘善舉隨時飲助不勝殫述光緒壬辰卒賜卹如例子謚勇恪國史館立傳准建專祠卜葬於南陵上北鄉麻橋阮家村之陽子傳薪二品廕生特用知府傳芳一品廕生三品銜候選道傳儒傳蔚傳芬均諸生後

儒官守備芬官雲南河西縣知縣蔚官湖北知府

徐錦標字潤生生而英偉有澄清四方之志咸豐十年粵匪圍縣城佐民團固守同治元年李文忠公督師上海以行伍投効大營轉戰數省身先士卒疊克名城二年收復常熟昭文等縣三年克復蘇州省城及江陰無錫金匱等縣歷保至參將賞戴花翎五年奉調援浙復克湖州長興等縣擢副將以東南軍事告竣擒賊猖獗移師征剿所向克捷七年肅清叙功以總兵記名簡放旋以傷疾告歸九年卒年三十四未竟其用惜哉

王昌齡字鶴松同治元年投効水師定湘營隨營主  
諭俊明攻克太平擒獲賊酋賊獻刀馬求免卻而釋  
之卒致降附諭益加器重旋克復蕪湖東西梁山金  
柱關和州裕溪口各城隘兵部侍郎彭玉麟保奏賞  
給軍功繼克無爲州九袱洲以外委拔用又克高淳  
溧水東壩以千總補用賊據金陵草鞋峽攻四載不  
能下昌齡夜率士卒焚其輜重天明賊遁嗣克南京  
江督曾國藩彙報案內准以守備用任長江水師湖  
南沅江營外委時捻匪肇衅沅民惶懼乃輕騎探賊  
巢得其虛實殲厥渠魁壬申陞湖北陸溪營把總癸

酉隨彭玉麟巡察兩廣閩浙台州海寇黃金滿招集  
亡命負險海隅浙省官軍不能制朝命彭玉麟平之  
昌齡曰是可招安乃偕荊州營千總章文彬見黃陳  
說利害黃卒投誠後歷任荊州營千總金陵營守備  
大通營及太平營都司乙未海防戒嚴江督張之洞  
委帶滿字右營駐紮通州海門等處及和約成始已  
己亥兼護提標中軍副將代行長江提督篆務庚子  
任江西湖口鎮中軍遊擊剿撫德化星子各縣會匪  
癸卯陞湖南沅江營參將丁未卒於任奉旨祀水師

以上新增

南陵縣志

卷二十九

人物

三十一

南陵縣志卷二十九終

